

NAŠA STRANKA  
O.O. BOS. PETROVAC  
UL. BOSANSKA BB  
77250 BOS.PETROVAC

OPĆI  
PROGRAMSKI  
CILJEVI NAŠE  
STRANKE:

- Otvoreno društvo
- Ekonomski rast
- Građanska prava
- Akademske slobode
- Naobrazba
- Radno pravo
- Sindikalna prava
- Prava neuposlenih
- Zabrana diskriminacije
- Borba protiv kriminala, korupcije i terorizma
- Zaštita djece
- Porodiljsko odsustvo
- Briga za stare osobe
- Briga za osobe s onesposobljenjem
- Socijalna sigurnost za sve
- Zdravstvena zaštita za sve
- Sigurnost života na selu
- Mir, sigurnost i održivi razvitak
- Lokalna samouprava

## SADRŽAJ

Interview sa	2
Osnivanje OONS Bos. Petrovac	4
Aktivnosti OONS Bos. Petrovac	4
Izvod iz	5
Poziv	6
Adresa i kontakt	7

# NAŠA STRANKA

Opštinska Organizacija Bosanski Petrovac

IZDANJE BROJ 1

JUNI, 2008. GODINE

## Općenito o NAŠOJ STRANCI

Smišljeno inducirana i uporno održavana politička kriza bh. društva i punih trinaest godina nakon rata onemogućava normalizaciju života, svjesno i na najperfidniji način ponižavajući ljude (građane) naše zemlje.

Tobožnja "zaštita vitalnog nacionalnog interesa" izmetla se u svojevrсно zavaravanje građanstva i učvršćivanje rigidno shvaćenih etnopolitičkih koncepata koji svugdje vode, samo ne tamo gdje uporno i godinama na sav glas obećavaju da vode – u Evropu.

NAŠA STRANKA je višenacionalna i demokratska. Organizovali

smo se zbog 51% ljudi koji ne izlaze na izbore. Oni moraju shvatiti da niko neće doći da nam promjeni situaciju. To moramo učiniti sami i građani ove zemlje ne trebaju biti glasači, nego birači. Naša je ideja da nas vode najbolji, a ne najpodobniji, da nas vode mladi i novi ljudi!

Dugujemo budućim generacijama jedan častan pokušaj angažmana svih nas kako bismo im ostavili bolje i uređenije društvo! Sretniju i izvjesniju budućnost!  
*"Nažalost, ne živimo u državi u kojoj politiku i našu sudbinu možemo prepustiti profesionalnim političarima..."*-Dino Mustafić.

Odgovornost i težak rad je pred nama, a to je sve što nam je preostalo....

Jedini izbor je da se svi pokrenemo, jer niko neće doći da nam napravi bolje sutra!!!!

**MI VODIMO POLITIKU  
SPAJANJA, A NE  
RAZDVAJANJA!!!**

*E.Hajder*

## Zašto ovaj newsletter?

U vremenu kada blagovremena informacija predstavlja neprocjenjivu vrijednost, a u nedostatku dovoljno kvalitetnog protoka informacija kako u samom Bosanskom Petrovcu između Opštine i građana, tako i Opštine i dijaspor, aktivisti NAŠE STRANKE su odlučili

pokrenuti ovaj newsletter koji upravo čitate.

Newsletter je namijenjen svim građanima Bosanskog Petrovca, koji su željni blagovremene i tačne informacije.

U ovom newsletter-u glavne teme će biti one koje pokreću i tiču se upravo nas, Petrovčana.

Redovno ćemo objavljivati informacije koje su bitne kako za nas, tako i za naš grad.

Newsletter će biti objavljan kako u elektronskoj, tako i u štampanoj formi i izlazit će minimalno jednom mjesečno, što će ponajviše zavisiti od Vas čitalaca.

# Interview sa predsjednikom...

Prenosimo Vam Interview koji je g-din Bojan Bajić, predsjednik NAŠE STRANKE dao za portal [www.sarajevo-x.com](http://www.sarajevo-x.com)

Bojan Bajić za Sarajevo-x.com: "Ne obećavamo ništa!"

Bojan Bajić za naš portal govori o planovima "Naše stranke", obećanjima koja neće davati, šansama za BiH, strahovima tri naroda, te o tome zašto ovu zemlju ne može pokrenuti ni 100 Danisa ni 240 Bojana, nego mi sami.

**Bojane, najprije čestitke za izbor na predsjedničku funkciju "Naše stranke". Osjećaš li se kao predsjednik i jesi li poput ovdašnjih predsjednika odmah dobio neke privilegije?**

Hvala na čestitkama. Osjećam se kao čovjek sa puno odgovornosti i beskonačno puno posla ispred sebe. Pošto "Naša stranka" kreće od nule, nikakve privilegije nisam ni mogao dobiti, jer stranka tek treba da izgradi svoju strukturu i kapacitete na terenu. Svjestan sam da će ovaj četvorogodišnji mandat (po statutu nema mogućnosti produženja) proteći u jednom izgaranju i trošenju puno energije u gradnji moderne političke organizacije, sposobne da oslobodi sve intelektualne i kreativne kapacitete našeg zarobljenog društva.

**Ljudi, barem u Sarajevu, pozitivno reaguju na činjenicu da si se ti pojavio na političkoj sceni, ali s druge strane, tu su i pitanja poput – šta Bojan, pa makar i sa Danisovim imenom iza sebe, može efikasno uraditi protiv ove tri nacionalne utvrde? Šta to vi nudite novo u "Našoj stranci"?**

Bojan bi sam mogao svašta uraditi kad bi imao čarobni štapić, ali pošto nema, onda je prinuđen da sa istomišljenicima ustroji istinsku demokratsku stranku, koja bi bila u stanju da okupi 500.000 ljudi oko projekta budućnosti i života. Tri nacionalne utvrde počivaju na strahu, zato "Naša stranka" traži podršku običnog čovjeka kako bi ukinula strah u ovoj napaćenoj zemlji. Svi oni koji kažu da to nije moguće, otežavaju ovaj posao, zato je potrebno uvesti više pozitivizma u naše razmišljanje i glasno reći da je moguće, i to je to, promjena će doći. Kaži da je moguće, pa će nam onda nedostajati još

samo 499.999 ljudi za naš projekat. Uradi to radi sebe, makar si pokušao, ništa te ne košta, a savjest će biti mirnija.

"Naša stranka" nudi otvorena vrata za sve proaktivne, kompromisne, optimistične i ljude željne života da se uključe i stvore kritičnu masu koja će ovu zemlju uključiti u red modernih i civilizovanih evropskih zemalja.

**Ti imaš dosta staža u nevladinom sektoru i pokušao si dosta promjena napraviti s te strane. Neke su se i desile. Ali vjeruješ li iskreno da je u ovoj zemlji moguće razbuditi građansku svijest i konačno ljudima pokazati da žive u siromašnoj zemlji koja je zadnja u Evropi u skoro svemu? Kako im pristupiti kad su mnogi pokušali a nisu uspjeli?**

Strah da će se nešto otcijepiti, ukinuti ili rasparčati u ovoj zemlji blokira svaku mogućnost da se razvije građanska svijest o kojoj Vi govorite i da se ljudi okrenu stvarnim životnim problemima. Politika koja manipuliše gore pobrojanim strahovima je rak rana našeg društva. Racionalna politika ih može poraziti, jer će pod brojem jedan otkloniti strahove, kao preduslov bilo kakve normalne priče. Racionalna formula je jednostavna: "Nema otcjepljenja, nema ukidanja, nema novih parčanja", što automatski eliminiše političke manipulante sa scene, a daje priliku građanima da relaksiranije na evropskom putu odlučuju koja će transformacija po njih imati pozitivne, a koja negativne konsekvence u stvarnom životu. Sve dok budemo nasjedali na nemoguće ciljeve, neostvarive i opasne, imaćemo političare koji su nam već pojeli 13 godina od rata, zagovarajući nemoguće ideje od kojih su odustali u Dejtonu.

**Šta tebi najviše smeta u BiH i šta najprije želiš promijeniti?**

Pasivno društvo mi najviše smeta. Pasivan čovjek smatra da je kritika drugog vrhunac pameti, a nije svjestan da je sam lijen, nedovoljno preduzimljiv i aktivan, pomalo zavidan i ljubomoran, te ljut i nezadovoljan samim sobom. A bogami i glup, posmatrajući s aspekta uludo potrošenog vremena baveći se nekim drugim i smišljajući kritike na račun drugog, dok taj drugi u isto vrijeme vozi svoj fazon i bavi se sobom, ne gubeći ni sekundu vremena u sopstvenom razvoju. Međutim,

svjestan sam da aktualna politika stvara sve više pasivnih ljudi, pa zato treba paralelno voditi akciju mijenjanja i politike i društva.

**Neki dijelovi zemlje, poput istočnih dijelova Dodikovog boljeg dijela BiH, zaista odumiru, ljudi se iseljavaju, odlaze negdje gdje je bolje. U tvome rodnom gradu Rudom takva je situacija. Gdje tu vidiš izlaz osim odlaska od vlastitog doma?**

Istočni dio Dodikovog boljeg dijela BiH je najgori dio Bosne i Hercegovine, to garantujem (misli se na stepen ekonomskog razvoja). Rješenje vidim u decentralizaciji, jačanju lokalnog nivoa vlasti, te ozbiljnom pristupu u planiranju održivog razvoja na lokalnom i regionalnom nivou, te u turističke svrhe iskorištavanju mnogobrojnih prirodnih potencijala. Za ovo sve je neophodno ubrzano kretanje BiH ka EU, kako bi se kao zemlja otvorili za turizam, fondove i investicije. Hoću reći da su lokalni naponi skoro pa uzaludni, ako lokalni razvoj ne prati državna strategija.

**Mladi u BiH su posebna priča kad treba davati obećanja o boljem životu, priključenju EU, slobodnom kretanju i komunikaciji sa ostatkom Evrope. Šta će te im vi obećati tokom vaše prve predizborne kampanje?**

Ništa. Već sam Vam rekao šta je koncept. Ne može ovu zemlju pokrenuti ni 100 Danisa, ni 240 Bojana, Maja, Borisa, Farisa... već stotine hiljada radno i imno sposobnih ljudi koji će raditi u svom i opštem interesu. Odgovornost naše generacije je da stvori jak politički pokret, koji će biti u stanju da stvori uslove kako bi rad pobjedio nerad, pamet glupost, mir da nadjača rat, a budućnost da bude jača od prošlosti. Ko kapira da je i sam odgovoran za loše stanje u BiH, dobro je došao u "Našu stranku" da zajedno radimo na dostizanju ciljeva iz Vašeg pitanja.

**U BiH period bogaćenja rijetkih pojedinaca i grupa nauštrb cijele zemlje traje predugo, i javni dužnosnici u velikoj većini rade za svoj džep. Javne odgovornosti i interesa gotovo da i nema. Znaš li ti kako natjerati te ljude da rade svoj posao i pored toga što su bezobrazno puno plaćeni?**

Uvijek se vraćamo na političke manipulante (čitaj lažove), kao uzrok svih problema. Stari ljudi su govorili: "Ko laže, taj i krade", a u prevodu: "Ko na laži glasove skuplja, taj će i što šta drugo skupljati dok je na vlasti". Dakle, ako neko nudi otcjepljenje, ukidanje ili parčanje, taj je lažov i manipulant. Ako političar pretenduje da se bavi istorijom, umjesto da to omogući istoričarima, onda je manipulant i lažov. Ili ako licitira sa osjećanjima mržnje ili ljubavi pojedinačnih osoba ili grupa naspram drugih osoba ili grupa, umjesto da zaprijeti silom zakona svakome ko drugom hoće glavu kamenom razbiti, opet je manipulant i lažov. Prepoznati lažova u politici je prvi korak ka sprečavanju krađe i zloupotrebe. Poštena politika je preduslov za rad i opšti interes. Mi smo izgradili poštenu i korektnu, racionalnu političku poziciju, okupili mlade, ali uspješne i neukaljane ljude, ljude koji u opštem razvoju i napretku vide i svoj razvoj, a ne kao do sada gdje mnogi u

opštem propadanju vide svoju šansu. Govorimo iskreno i ne služimo se strahom i podilaženjem u prikupljanju političke podrške.

**Kako možemo biti sigurni i vjerovati da ako glasamo za kandidata "Naše stranke" na lokalnim izborima, i on bude izabran za načelnika opštine/općine, da se neće ponašati kao tipični predstavnik ovog nacionalnog trojstva koje opljačka sve što se opljačkati može? Imate li neki poseban kodeks za to, možda?**

Među vrhovne prioritete smo uvrstili vraćanje morala u bh. politiku, a dobro ste me napomenuli za kodeks, pa Vam obećavam da ćemo do formiranja kandidatskih listi napraviti kodeks o moralnosti prilikom obnašanja funkcija ispred "Naše stranke". A, moram reći da se ne slažem sa pristupom generalizacije svih predstavnika tzv. nacionalnog trojstva, kao pljačkaša, kako ste rekli u pitanju, jer se moramo čuvati svih vrsta generalizacija i kolektivizacija. Za svako djelo mora postojati konkretno ime i prezime, a to je jedini recept i u svim drugim oblastima.

**Kakve su šanse i gdje, da dobijete barem neko mjesto načelnika u BiH? Je li prerano govoriti o toliko podrške Našoj stranci?**

Iako prve informacije s terena govore da nam podrška konstantno raste, još uvijek se nećemo zalijetati sa procjenama, dok ne završimo fazu širenja stranke i konstituisanje opštinskih odbora. Važno je još jednom ponoviti da smo se mi spremili da trčimo politički maraton, tako da opštinske izbore posmatramo kao prvu stepenicu u procesu stvaranja političke alternative u BiH.

**Reci nam kakvi su vam planovi za lokalne izbore koji su ove godine? Je li izlazite na njih, u kojim dijelovima zemlje i šta će biti u fokusu vaše kampanje?**

Izlazimo na izbore. Idemo u svim dijelovima zemlje, bez imperativa da se pojavimo u puno opština. Idemo tamo gdje se jave kvalitetni ljudi, koji bi mogli značiti pozitivnu promjenu u sredini iz koje dolaze. O fokusu kampanje je još rano govoriti.

**I na kraju, jesi li optimista po pitanju budućnosti BiH i kako vidiš njenu budućnost, ako je uopšte vidiš?**

BiH ima šanse da bude normalna zemlja, čak ima dobre predispozicije. Ljudi su isto tako dobri, mada ih svi kritikuju, kao svi su nacionalisti i sl., što nije tačno. Ljudi u BiH su uglavnom dobri, gostoprимljivi, doduše malo nagli u rakiji i ponekad povodljivi za lošim politikama, ali baš zato se trebamo izboriti za korektne politike i to bi bio recept uspjeha. Ako se stvori politička alternativa i napravi smjena generacija u vođstvu ove zemlje, budućnost BiH bi mogla biti čak veoma svijetla u poređenju sa mrakom koji danas vlada, a sve to u roku od desetak godina, što opet nije puno, u poređenju sa ovih 17 godina iza nas što smo uludo izgubili.

Razgovarao: Asim Bešlija

## Osnivanje Općinske Organizacije Bosanski Petrovac

Nakon uspješne promocije NAŠE STRANKE koja je održana 13.05.2008. godine u prostorijama Općinske Vijećnice, Inicijativni odbor je pristupio i zvaničnom osnivanju Općinske Organizacije NAŠE STRANKE Bosanski Petrovac (OONS).

Nakon zasjedanja Inicijativnog odbora i osnivanja OONS Bos. Petrovac, pristupilo se i imenovanju u organe stranke.

Općinski odbor je popunjen sa 20 članova.

Za predsjednika jednoglasno

je izabran g-din Zdravko Radošević, za potpredsjednika je izabrana g-đica Ermina Hidić I za sekretara stranke g-đa Lela Mehmedbegović.

Samim tim OONS Bos. Petrovac je postao funkcionalna i odpočela je sa radom.

Od osnivanja OONS Bos. Petrovac do danas održano je 9 radnih sastanaka i formiran je Izborni štab, Grupa za izradu izbornog programa OO, kadrovska komisija te radne grupe po pojedinim

oblastima djelovanja.

Na radnim sastancima u razgovoru sa građanima Bos. Petrovca članovi OONS Bos. Petrovac su dobili informacije o svakodnevnim problemima koji naše građane muče, a koje će pokušati riješiti članovi OONS Bos. Petrovac ukoliko im se pruži šansa da stvore bolju sredinu za sve građane Bos. Petrovca

*F.Muratović*

**“OONS Bos. Petrovac redovno održava radne sastanke na kojima članovi i simpatizeri Stranke razgovaraju i informišu se o tekućim problemima kako u gradu tako i u MZ.”**

## Aktivnosti OONS Bos. Petrovac

Da bi dokazali da se razlikujemo od ostalih političkih opcija NAŠA STRANKA je od početka zauzela radni stav, te je taj radni stav preuzelo i njeno članstvo.

U okviru OONS Bos. Petrovac svake subote u 18h se održavaju radni sastanci na kojima prisustvuju članovi i simpatizeri NAŠE STRANKE, na kojima se razgovara o tekućim problemima kako u gradu tako i u MZ-a.

Takvu radnu praksu NAŠA STRANKA će zadržati i nakon izbora, bez obzira na izborni rezultat.

Centrala NAŠE STRANKE je donijela odluku o finansiranju poslovnog prostora OONS Bos. Petrovac, tako da su članovi stranke krenuli u potražnju za adekvatnim prostom. Nakon obilaska nekoliko lokacija članovi su se odlučili za poslovni proctor u Bosanskoj ulici, odmah do Elektrodistribucije, kao svoj radni proctor koji će biti između ostalog i naš info-centar gdje građani mogu doći i informisati se kako o našem radu tako i drugim informacijama bitnim za svakodnevni život u Bos. Petrovcu.

OONS Bos. Petrovac je donio odluku da se svake sedmice ili u skladu sa drugim obavezama I raspoloživim vremenom članova OONS Bos.

Petrovac, posjećuje jedna MZ i sa stanovnicima tih MZ-a razgovara o njihovim problemima, jer je poznato da svaka MZ ima svoj “specifičan i svojstven” prioritetni problem.

Unutar OONS Bos. Petrovac formirane su Radne grupe po oblastima koje će unutar svojih zaduženja baviti se specifičnim problemima, te razvijanju strategija i planova kako da uopšte ne dođe do tih problema.

Radne grupe su raspoređene po sljedećim oblastima:

- poljoprivreda
- Ekonomija
- Zdravstvo
- Školstvo
- Kultura
- Sport

Radne grupe nisu konačne i u daljnjem radu će doći do određenih korigovanja i dodavanja drugih radnih grupa za druge oblasti ukoliko se za njih izjasne građani Bos. Petrovca.

Također, je formiran i Izborni štab OONS Bos. Petrovac, koji je preuzeo sljedeća zaduženja : priprema i organizacija članova i volontera na

dan izbora, briga o biračkim mjestima, medijska kampanja, organizaciju skupova po MZ i prikupljanje novca, na čelu sa Seadom Kadićem kao predsjednikom Izbornog štaba. Izborni štab je preuzeo svoja zaduženja, te ih između članova Izbornog štaba podijelio. Upravo kao rezultat rada Izbornog štaba čitate ovaj newsletter.

NAŠA STRANKA između osalih uvodi i još jednu praksu u dnevopolitički život. NAŠA STRANKA će na predstojeće lokalne izbore izaći u 53 Opštine. U sve i jednoj od te 53 Opštine Izborni program NAŠE STRANKE će biti različit. Različit iz razloga što svaka sredina ima svoje specifične probleme i članovi tih OONS će se baviti upravo tim problemima koji njihove građanje i muče. U ovom se i ogleda i transparentnosti, ali i povjerenje u članove i tijela OONS od strane centrale stranke samim tim što je Izborni program pušten na izradu OONS.

Tako da će i OONS Bos. Petrovac imati svoj vlastiti

Izborni program, te je za tu namjenu i imenovana Radna grupa za izradu Izbornog programa na čelu sa g-đicom Erminom Hidić kao predsjednicom Radne grupe. Radna grupa je dobila rok do 10.07.2008. godine da izrade Izborni program OONS Bos. Petrovac sa kojim ćemo i izaći na predstojeće izbore.

Kadrovska komisija koja je formirana unutar OONS Bos. Petrovac dobila je zadatak da do 24.06.2008. godine pripremi liste kandidata koji će se na principu samokandidature kandidovati za načelnika/cu, nosioca liste i vijećnike. Nakon izvršene samokandidature i formiranja liste, održat će se Zbor članstva NAŠE STRANKE na kojem će članovi tajnim glasanjem putem preferencijalnih listi izabrati najsposobnije kandidate za budućeg Načelnika i Vijećnike Bosanskog Petrovca.

F.Muratović

## Izvod iz Statuta

Osnovni programski ciljevi podrazumijevaju:

a) pokretanje i intenziviranje započetih reformskih procesa u cilju općeg dobra za sve građane i građanke BiH, bez obzira na pripadanje ili nepripadanje entitetu, naciji ili vjerskoj zajednici;

b) objedinjavanje i pokretanje demokratskih snaga i ideja koje podrazumijevaju saglasnost, a ne odbijanje reformskih procesa u cilju postizanja boljeg života za sve stanovnike Bosne i Hercegovine;

c) postizanje općeg društvenog konsenzusa o najbitnijim pitanjima sa kojima se Bosna i Hercegovina suočava kroz politički dijalog;

d) provođenje osnovnih društvenih reformi uz etničku i građansku saglasnost i učešće svih društvenih i

političkih subjekata;

e) poštovanje individue, njenog dostojanstva, prava i sloboda, nezavisno od političkog ili vjerskog uvjerenja, nacionalne pripadnosti, spola i socijalnog stanja;

f) ostvarivanje socijalne i nacionalne ravnopravnosti građana i građanki i njihovih kolektiviteta u Bosni i Hercegovini;

g) ostvarivanje državnog poretka na osnovama razvijene demokratije, vladavine prava i socijalne pravde i jednakosti ljudi;

h) osiguranje prava ljudi na zdravstvenu zaštitu, obrazovanje, socijalnu zaštitu, radna, porodična i sva druga prava pod jednakim uvjetima;

i) ekonomski razvoj zemlje

koji će omogućiti univerzalni „paket“ osnovnih ekonomskih, socijalnih i zdravstvenih usluga i prava za sve građane/ke;

j) razvoj pravednog društva sa evropskim kvalitetama života koji će ostvariti građani/ke svojim radom u našoj, a ne tuđoj zemlji;

k) razvoj lokalne samouprave na principima evropskih vrijednosti;

l) zaštitu prirode i čovjekove okoline;

m) borbu protiv zloupotreba, korupcije i kriminala;

n) uključenje Bosne i Hercegovine u regionalne, evropske i svjetske integracije.

**“Naši  
programski  
ciljevi usvojeni  
u Statutu”**

# Pozivnica

**Poštovani Građani/ke, Članovi I simpatizeri,**

**Pozivamo Vas da prisustvujete Zboru Članova NAŠE STRANKE u utorak  
24.06.2008. godine u Općinskoj vijećnici Bos. Petrovca u 19h.**

**Na Zboru će Vam se predstaviti kandidati OONS Bos. Petrovac za  
lokalne izbore 2008. godine za budućeg Načelnika I vijećnike Bosanskog  
Petrovca.**

**Svi ste dobro došli!!!!**

**Dođite da izaberemo najsposobnije građane za budućeg Načelnika I  
vijećnike Bosanskog Petrovca, jer ovaj grad može bolje!!!!**

**NAŠA STRANKA  
OO BOS. PETROVAC**

BOSANSKA BB  
77250 BOS. PETROVAC  
BOSNA I HERCEGOVINA  
Web : [www.nasastranka.ba](http://www.nasastranka.ba)  
[www.oons.bospetrovac.blogger.ba](http://www.oons.bospetrovac.blogger.ba)  
E-mail : [fikret.muratovic@bih.net.ba](mailto:fikret.muratovic@bih.net.ba)

**Ako I Vi dijelite sa nama naše vizije I imate želju za boljim I ljepšim Bos. Petrovcem I želite da nam pomognete u bilo kojem obliku, da li to bilo kao član, simpatizer, vanjski saradnik ili želite biti kandidat za izbore možete se učlaniti na web stranici **NAŠE STRANKE** na [www.nasastranka.ba](http://www.nasastranka.ba).**

**Ukoliko želite redovno primati newsletter Općinske Organizacije **NAŠE STRANKE** Bosanski Petrovac, prijavite se na e-mail : [fikret.muratovic@bih.net.ba](mailto:fikret.muratovic@bih.net.ba)  
**Ako tražite više informacija o radu OONS Bos. Petrovac posjetite [www.oons.bospetrovac.blogger.ba](http://www.oons.bospetrovac.blogger.ba)****

